



PL  
2463  
z6c58  
v.1









雍正九年十二月十六日奉

上諭逆賊呂留良以批評時藝託名講學海內士子  
崇其著述非一日矣今罪蹟昭彰普天共憤內外臣  
工咸以罪犯私著之書急宜焚燬爲請朕以爲從來  
無悖逆之大儒以呂留良之奸邪卽令學問淹貫文  
辭雅馴而身蹈悖逆之行口談聖賢之言言行不符  
之小人其所著之書尚足令人尊信乎若因其人可  
誅而謂其書宜燬燬之固未必能盡卽燬之而絕無  
留遺天下後世更何從窺其底蘊而辨其道學之真



僞乎以故燬書之議槩未允行頃者翰林顧成天奏稱呂留良所刊四書講義語錄等書粗浮淺鄙毫無發明宜勅學臣曉諭多士勿惑於邪說爰命在廷儒臣詳加檢閱茲據大學士朱軾等於其講義語錄逐條摘駁纂輯成帙呈請刊刻徧頒學宮朕以逆賊所犯者朝廷之大法也諸臣所駁者章句之末學也朕惟秉至公以執法而於著書者之爲醇爲疵與駁書者之或是或非悉聽之天下之公論後世之公評朕皆置之不問也大學士朱軾等旣請刊刻頒布學宮



俾遠近寡識之士子不至溺於邪說朕思此請亦屬  
可行姑從之以俟天下後世之讀書者特諭



[illegible]



雍正九年十二月十四日文華殿大學士兼吏部

尚書臣朱軾禮部右侍郎臣吳襄等謹

奏爲崇正闢邪以端學術以覺愚蒙事雍正九年三月二十五日翰林院編修顧成天奏稱逆賊呂留良悖逆之罪擢髮莫數普天之下苟明大義者無不切齒痛恨惟是逆賊少年狎邪傾巧驚悍考試劣等後遂批點時文刊販書籍借講學沽名卽借講學媒利動輒高自位置毀詆前人蔑視時輩而寡見渺聞之流轉相附和論語言色取仁而行違



居之不疑邦家必聞正斯人也臣細觀其所著講義語錄等書粗浮淺鄙毫無發明徒一味咆哮聳人觀聽竭其伎倆不過以蓋其回邪而庸耳俗目見其大言不忤尊信愈深臣愚以爲覺天下萬世人心之迷尤當正天下萬世學術之誤仰請

皇上特賜派員查閱將呂留良書中剿襲儒先及議論悖謬引據舛訛之處一一根究原委詳悉辨明

勅下直省學臣徧示多士俾知其筆舌之妄由其學術之僞學術之僞由其心術之邪出此入彼不容竝



立則是非明而學術正謹庠序之教卽在於此矣  
等因奉

旨着朱軾吳襄總閱方苞吳龍應顧成天曹一士查閱  
欽此欽遵臣等隨將逆賊呂留良所著四書講義  
語錄諸書通行查閱按其議論妄誕支離搜厥根  
原粗疎鄙倍總由逆賊以毫無底蘊之學肆其毫  
無忌憚之言勦襲程朱實與程朱繆戾援引經傳  
每與經傳舛訛臣等根究原委逐條摘駁狂談臆  
說敗露無餘謹抄錄成帙恭呈



御覽伏乞

皇上睿鑒

勅令刊布直省學宮俾僻遠寡識之士子不至溺於邪  
說於學術人心甚有裨益臣等謹

奏



駁呂留良四書講義

大學

聖經

呂留良云大學無重心義以其本天也盡心只可當知至存心只可當正心不可以該明新也單說心卽本心之學非聖學也

張子曰心統性情者也。朱子引孟子言仁之心義之心以証心統性之說。引孟子言惻隱之心羞惡之心以証心統情之說。是則性非他卽理之具於心而寂然不動者是也。情非他卽性之發於外而感而遂通者是也。寂



然不動者。心之體也。感而遂通者。心之用也。留良乃謂大學無重心之義。以其本天也。單說心。卽本心之學。非聖學也。此迷謬之甚者。夫聖人本天。釋氏本心。其言出於伊川程子。所謂本心也者。佛書所云三界惟心。萬法惟識。心生則種種法生。心滅則種種法滅是也。彼以世界爲幻。萬事皆由心生。故曰本心。所謂本天也者。惟天之命。於穆不已。陰陽五行。化生萬物。人得之則爲仁義禮智之性。發之則爲惻隱羞惡辭讓是非之情。施之則爲親義序別信之倫是也。萬理萬事。皆以天爲本。故曰



本天二者固自不同。然所謂天者。理而已矣。理之具於心者。卽其命於天者也。虞廷之傳心也。曰人心惟危。道心惟微。朱子謂形骸上起底見識。便是人心。義理上起底見識。便是道心。道心卽明德也。道心微而人心危。此明德之所以待明也。惟精卽格致。惟一卽誠正也。西山真氏曰。大舜十六字。開萬世心學之源。後之聖人更相授受。大抵教人守道心之正。而遏人心之流也。是則聖聖相承之學。無非心學也。安得謂單言心便非聖學乎。若釋氏之本心。心其所心。非吾儒所謂心也。上蔡謝氏



云。釋氏所謂心。乃吾儒所謂意。意者心之所發。有主張造作之義。彼所謂生滅由心者。皆意爲之也。留良不辨釋氏認心之誤。乃以言心爲諱。至謂心不可言德。不可言學。其爲人心學術之害。不少也。

呂留良云。至善謂明明德。新民各有極。至之則止。至善者如學聖必孔子。而夷惠非所由。治法必唐虞三代。而五伯漢唐不足效之。謂也。

留良謂學聖必如孔子。治法必如唐虞三代。此於止至善之義。只說得大槩。與朱子集註或問之旨不符。註云。至善則事理當然之極也。或問云。是其所得於天。而見



於日用之間。固已莫不各有一定之則。何嘗專以造極  
歸宿之地爲言哉。蒙引曰。止至善。就八條目言。須兼橫  
說直說方是。以明德言。如能格物致知矣。而或未能誠  
意正心。能誠意正心矣。猶或未能修身。則是明德未能  
止於至善也。然知之致意之誠。心之正。身之修。一或少  
有苟且。而未能各造其極。使無一毫之遺憾焉。是亦未  
能止於至善也。新民之止於至善亦然。此論最爲明晰。  
然橫說中。又有橫直二義。卽如格一物。必格到十分。如  
補傳所云。因其已知之理。而益窮之。以求至乎其極。此



直說也。卽凡天下之物莫不如是以格之。必至於豁然  
貫通。乃爲至善。此橫說也。蓋析言之則一事一物莫不  
各有一至善。統言之則事事物物之止於至善。卽八條  
目之止於至善。八條目之止於至善。卽明德新民之止  
於至善也。今但云學聖如孔子。治法如唐虞三代。是專  
就歸宿之地言之也。苟不能於條目工夫處。隨事隨物  
求當然之極則而止之。欲學聖如孔子。治法如唐虞三  
代。安可得乎。

呂留良云上兩綱領知行並重。此一綱領却單重在  
知至善。只是難知。知得自然行得行處。只在上兩綱



領內不須更說。又云知止一節緊帖定第三句綱領說有此一節則此一綱領已了畢。以下八條目只就上兩綱領中條析次第言之。雖止至善卽在其中。然却不是此一綱領註脚。故知行並列也。

經所謂止至善者。非於明新之外。別有所謂至善。就明新二者各致其極而已。明德新民各有至善。至善先知而後行。是一串事。今留良謂上兩綱領知行並重。此一綱領單重在知。則是離至善之外。別有所謂明新而知行並重。離明新之外。別有所謂至善。而單重在知也。謬乎不謬乎。又謂至善只是難知。知得自然行得。語亦傷於易矣。夫知行二者俱不可廢。未聞有偏重之說也。故



朱子謂以先後言之。則知爲先。以輕重言之。則行爲重。此不易之論也。若如留良之說。則如尚書說命所云。非知之艱。行之維艱者。又何謂耶。又謂以下八條目。只就上兩綱領條析次第。不是止至善註脚。夫聖經並列八條目。以詳著明德新民之功。而止至善卽在其中。如留良說。則八條目外。須另補一條目爲止至善之註脚。而後可也。留良謂知止一節。止至善綱領已了畢。則似以此節爲止至善註脚也。然朱子云。物格知至。則知所止矣。意誠以下。則皆得所止之序也。然則明德新民註脚。



不又已在知止一節內耶。大抵聖人之言。分而未嘗不合。合而未嘗不分。所以爲理一分殊之妙也。而留良拘文牽義。破碎支離。講書若此。其自誤誤人。不亦甚哉。

呂留良云。有謂定靜安慮是心學。相因之妙曰天也。性也。理也。道也。皆可以言學。心獨不可以言學。心者所以爲學之物。無以心爲學者。惟釋氏本心以心爲盡頭。謂天性理道皆出其下。故曰心學。凡言心學者。皆釋氏之見也。

虞廷人心道心危微之判。正是心學之奧。成湯以禮制心。文王小心翼翼。孔子從心所欲不踰矩。顏子之心不違仁。孟子言存心。言養心。言擴充仁義之心。聖賢何嘗



不言心。但不是如釋氏無事於心。無心於事。爲心學耳。  
若因此遂諱言心學二字。是因噎廢食也。

呂留良云。心本無不正。緣意之不誠。習熟而本體亦有病。故正心傳謂有所忿懣恐懼好樂憂患。則不得其正。心體上安有此四者之病。可知從意之習熟生來。故欲正先誠。心指渾全之體。意指其零星發動之端。猶中庸之未發已發而有中和之名。其實原非二物。

誠意正心工夫雖相關。然所指各不同。誠意是欲心之所發。無一毫之不實。正心是欲心之本體。廓然大公。不爲外物所累。卽以忿懣好樂二者言之。喜則實喜。怒則實怒。如見善如不及。見不善如探湯。卽是意之誠。若夫



正心。則物來順應。可喜可怒在彼而已。無與焉。雖當喜怒時。此心常如明鏡止水。毫無渣滓。如定性書所謂動亦定。靜亦定。方是正心界分也。所以誠意之功極緊要。正心之事極精微。分明有兩層工夫。若如留良之說。心本無不正。皆由意之習熟使然。則大學止言誠意足矣。又何用列正心條目乎。

呂留良云。或云誠是嚴於思慮未起之先。卽居敬意。曰思慮未起之先。無處用誠。居敬不是誠意事。

謂誠意不在思慮未起時則可。謂思慮未起之先。無處用誠。則大謬也。中庸言不動而敬。不言而信。及戒慎不



觀恐懼不聞。正言思慮未起工夫也。曷謂無處用誠耶。且伊川云。未至於誠。必敬。然後誠。則敬乃誠之實功。何云居敬不是誠意事也。

呂留良云。有謂誠字中不可兼言善惡。只或有半善而非全善。或九分皆善而一分未盡善。亦是皆要致知致字極重。曰誠有半善非全善。九分善而一分未盡善。此亦是致知甲裏話。非誠字中話也。或曰十分九分之說。本朱子曰。朱子是講自欺。謂爲善之意有不足。非指意之善惡也。

知善知惡。此致知甲裏事也。若意之所發。有半善未全善。九分善。一分未盡善。此正意中善惡之分數也。豈可混云致知甲裏事耶。若以意之未盡善。俱責之致知。則



誠意之功。又將何用耶。朱子云。人之爲善。須是十分真實。若有六七分爲善。又有兩三分爲惡的意思。便不是自慊。又云。如見孺子入井而救之。是好意。其間有些子要譽之意。前面好意都虛了。按此。則是朱子分數之說。明指意之善惡而言。卽如留良言。朱子是講自欺。謂爲善之意有未足。爲善之意未足。是卽不善也。留良乃云。非指意之善惡。然則意之善惡。又於何而剖之耶。夫致知與誠意。本二也。而留良混之。自欺不自欺。本屬意之事也。而留良分之。迷謬至此。其誤人亦甚矣。



呂留良云。凡人意之所發。必從熟處生。卽夢寐病狂醉亂時。皆可驗熟處。乃其所明也。故欲誠意。必先致知。謂平素於道理講究得明白。則意發必當。乃可得而誠耳。若謂知能覺照。意使不爲惡。能辨決。意之疑信。則知在意後。用力矣。致知是意未發時工夫。到意發後。加審幾省察。乃誠意中之慎。獨非先致之知也。致知致字。固在誠意之先。若夫知。則貫徹始終。雖至平天下。如何離得。蓋知與行對。相附而不相離。迭爲後先者也。如留良說。一交誠意界上。便不許說出一箇知字。夫知譬則目視也。行譬則足行也。東西南北。固必目見之。而後動足矣。當舉步之際。將閉目而冥行乎。抑將張目而覺察其道途之險易乎。留良不知此理。至乃謂審



幾省察。乃誠意中之慎獨。非先致之知也。亦惑矣。夫知一而已。平日之致知益精。則臨時之省察益明。今謂非先致之知。則用何物以審幾。用何物以省察。其迷謬一至此乎。

呂留良云。今人誤以心猶得半。合意乃全。不知心無全半。意亦無全半。意妄則心亦妄。意慊則心亦慊。無各半而互全之理。看正心傳有所忿懣四者可見。心體上有病。皆由發用處做成。故欲正先誠也。

心統性情。通貫動靜者也。意則心之所發。單指動處言也。誠意是就發動緊要處著力。正心方是連片工夫。所以朱子曰。誠意卽謹獨工夫。正心卽戒慎恐懼工夫。與



中庸一理也。彼謂心猶得半。合意乃全者。固非。而留良遂謂意亦無全半。心體上有病。皆由發用處做成。如此則聖經於誠意之後。再標正心條目。爲贅剩矣。此大謬也。

呂留良云。不可云格物致知是一件。又不可云格物致知是兩件。是物是知。隨格隨致。於此能融會出之。自覺圓通。不滯在字。更不須下註腳也。

經云致知在格物。則格物致知爲一件。明矣。今觀朱子補傳及其他言論。未曾於格物之外。另有致知工夫也。而留良云不可作一件。是何說哉。且旣自云不可作一



件又云不可作兩件夫天下之理同異二端而已非一則兩非兩則一既非一又非兩則亦無說之可通矣留良欲教人融會如之何其融會耶此等講解謂非自誤誤人其誰信之

呂留良云補傳云人心之靈莫不有知天下之物莫不有理人不善解會便判然分作兩件極意膠黏終不泯縫固屬天下之拙識矣然又有故爲高妙之論者謂知固在內物亦不在外故格物卽爲致知此卽紫薇舍人天下歸仁謂八荒洞達皆在吾闥之意其說似爲精微然果如是則人心之中只有一知便了安得更有所爲物者或謂物雖在外而物之理實在內此又不然且如馬牛物也馬之可乘牛之可服理也雖知馬牛之可乘服其理似在吾心然而馬不可穿鼻牛不可絡首必將馬牛反覆推究而後得其可



乘可服之理則絡首之理仍在馬穿鼻之理仍在牛也。但謂格在外之物卽是致吾心之知。不是判然分作兩件。以此爲內外合一之旨則可耳。

知在內。物亦不在外。故格物卽爲致知。此平實之論。非高妙也。孟子曰。萬物皆備於我。朱子曰。心雖主乎一身。而其體之虛靈足以管乎天下之理。理雖散在萬物。而其用之微妙實不外乎一人之心。不可以內外精粗而論也。今留良乃云。人心之中只有一知。安得更有所謂物者。析精粗爲二致。迷內外爲二本。可謂不達理之甚矣。且如此。則知自知而物自物。各不相干。經所謂致知



在格物。物格而知至者。先不可通矣。絡馬首。穿牛鼻。其理雖在牛馬。而亦在吾心。此合內外之道也。若使吾心原無處物制事之理。則雖牛馬在前。亦懵然不曉矣。安能得其可乘可服之故。而穿之絡之耶。夫告子外義。而孟子闢之。留良亦習聞其說矣。今講致知。乃以物理在心之外。然則格物窮理。乃增其所本無。行仁蹈義。亦強以自外至。有如斯之聖學耶。此留良受病之根本。於此一差。則無所不差矣。所以言心言理。處處窒礙也。又自知其有所不通。末乃自救之云。格在外之物。卽是致吾



心之知。不是判然分作兩件。以此爲內外合一之旨。則可耳。夫留良旣以物理在心之外。則格在外之物。不能致吾心之知。亦明矣。又烏能使內外合一耶。徒爲矛盾。而終不可通。甚矣其謬也。

呂留良云。自天子以至於庶人。有許多等級。其職業正各不同。然所以不同者。分也。非理也。故曰分殊理一。此節語勢側重。庶人邊見得。雖至庶人也。只是此本未嘗有別件。庶人無治國平天下之分。然到得修身。則治國平天下之理已具。只看他明明德力量如何耳。其本盛大。則其末濶遠。其本淺薄。則其末狹小。直到大德必受命匹夫。有天下。憑修身者。各自做去。固不容越分妄覩。亦未嘗禁人自致也。後世自上及下。總不以修身爲本。遂將此理看得詫異耳。又云。若必以治國平天下對本字。言道理雖濶大。然有可



自諉於本外者矣。又云從位說下故云自天子以至於庶人論理其實自庶人。以至於天子天子新民亦須從庶人齊家道理做起也。

大學者大人之學也。自天子以至於庶人皆學大人之學者也。故曰壹是皆以修身爲本。朱子或問云大學之教乃爲天子之元子衆子公卿大夫士之適子與國之俊秀而設。是皆將有天下國家之責而不可辭者。則其所以素教而豫養之者。安得不以天下國家爲已事之當然。而豫求所以正其本清其源乎。留良乃云此節側重庶人邊。庶人無治平之分。只看明明德分量何如。直



到大德受命匹夫有天下。憑修身者各自做去。荒唐詫異。一至於此。此留良之罪。所以通於天也。至本對末言。自天子至於庶人。本同。則末可知矣。今謂必言治平。則有可自諉於本外。又云論理其實自庶人至於天子。天子新民。須從庶人齊家道理做起。如此。則是庶人以齊家爲末。天子以治平爲末。而天子又兼庶人之末以爲末。推之天子而下。庶人而上。等級各別。大學之教。必一分疏。使各學其學而後可也。況天子與庶人同此家也。卽同此齊也。何所見而以齊家專屬之庶人乎。經文



明言自天子以至於庶人。何所見而謂論理則自庶人至於天子乎。種種謬戾。妄逞臆見。不至於無忌憚不止也。

### 康誥曰克明德章

呂留良云天命二字看中庸首句便分明在人曰性曰明德在天曰命曰明命只是一件因地頭分名目耳。經傳中命字有從理言者有從氣數言者。卽天字亦然。非謂有二天二命也。猶之只一心耳而虞廷分人心道心必如是說。此一件纔真實圓滿也。惟佛家最怪此說。則曰支離。曰兩橛。究竟他也不怪支離。兩橛。總怪這一箇理字耳。看楞嚴惟識圓覺等語。真是支離。他除却理字說天說命。只有這形象氣數耳。故說天命到極精妙。只是一無然終不奈這形象氣數何。遂爲因果報應生死輪迴之說。以亂之。却極淺鄙。



易破卽禪子亦心知其不然。遁以爲寓言。故佛家於天命上截。則空無下截。則粗陋。其黠者借粗陋說空。無借空無說粗陋以求渾一。不知真成兩橛也。

此章釋明明德。次節明命卽明德也。自其具於人心曰德。自其賦於天曰命。留良於明德之義。槩置不論。無端而曰天曰命曰理曰數曰佛。支離甚矣。且謂佛氏說天說命。只有形象氣數。亦非也。夫釋氏本心。一切世界山河大地。皆心所造。萬物萬事。因心成體。何自而有說天說命之談。留良動輒言本天本心之辨。至此。又言釋氏說天說命。亦矛盾甚矣。釋氏因果報應生死輪迴之說。



本謂人心所爲。有善有惡。是以報應生焉。而生死業報。由斯輪轉。與吾儒所謂氣數之說。何曾有一分干涉。而留良欲比而同之耶。且所引楞嚴。惟識圓覺三書。亦不類楞嚴第四篇。言地水火風世界緣起。以明覺心所造。留良見此。因以爲說天說命說氣數。似之而非也。至圓覺。惟識兩書。何曾一字談及造化。而亦以爲說天說命。不亦謬乎。留良動欲博闢二氏之名。不知而作於此。可見。

呂留良云峻字本不甚重。然帝堯分量自與湯文不同。克明爲帝王所同要的。確是堯之克明。須從峻字。



見得

新安陳氏曰。明德以此德本。體之明言。峻德以此德全體之大言。蒙引云。峻德非帝堯所獨。萬物皆備於我。堯舜與人同耳。留良乃云。堯與湯文不同。堯之克明。須從峻字見得。不知此章引三書以釋明明德之義。非尚論帝王也。下文總結曰。皆自明。何嘗分別三聖之高下乎。湯之盤銘曰。章。

呂留良云。就大人之學言。故曰新民。要之聖人自一身以外。天地萬物事理。云爲無非分內。大學總以民字該之。致中和而至位育。盡性而至叅贊。帝王與匹夫共此道理。共此責任。止說箇新民。則民字中品類。



恐有所不盡而無治民之位者。若可闕此義矣。故於結末下無所不用其極。句句包羅甚廣。見無事不在裏。無人不  
在裏也。

朱子答江德功書曰。自新固新民之本。然天下無一物非吾度內者。亦無一事非吾之所當爲者。譬如百尋之木。根本枝葉無不在焉。豈曰專用其本而棄其末哉。此言新民有新民之政。非身化之外。別無所事也。留良錯會無物非吾度內二語。遂謂天地萬物無非分內。帝王匹夫同此責任。無所不用。謂無人無事不在裏。其意欲爲無治民之位者。補足其義。不知大人之學。原無分乎。



貴賤何待補綴。況此節總結上文。謂自新新民皆當止於至善。集註甚明。何得節外生枝乎。

詩云邦畿千里章

呂留良云。仁敬孝慈信。固爲至善。然天下有許多仁敬孝慈信。其中大小淺深分數不同。不可不謂之善。而非其至也。必如文王之止。乃爲至善。要人從文王身上體會出自家至善。不卽以仁敬孝慈信虛義卽爲至善也。

朱子曰。仁敬亦有幾多般。這一事合如此。是仁敬。那一事又合如彼。是仁敬。此言仁敬孝慈信之理。隨事異宜。各有恰好當止之處。雖文王之敬止。亦只止其所當止。



而已。留良乃謂要人從文王身上體會出自家至善。不可卽以仁敬孝慈信虛義卽爲至善。此襲朱子說實與朱子之意背馳也。夫所謂虛義者。如韓退之原道云。道有君子小人。德有吉有凶。乃彼此通同名目。故曰道與德爲虛位。若仁敬孝慈信。乃一定之名。非邪正善惡兩途之所得而混稱。安得以泛言仁敬而謂之虛義耶。况分別於大小淺深之間以求至善。乃致知項下事。下節所言求止之功是也。若此節以仁敬孝慈信五者標至善之目。則其爲恰好當然之則。不待言矣。或問云。爲君



所當止者在於仁。爲臣所當止者在於敬。文王之可法可傳。亦不能加毫末於是焉。蓋萬事萬物。莫不各有當止之處。不待人之止之。而其理自在。譬如邦畿民之所止也。邱隅鳥之所止也。豈必待民止之而後爲邦畿鳥止之而後爲邱隅乎。此不特書旨不明。文理亦不通矣。

呂留良云。五倫惟父子兄弟從仁來。故不論是非。若君臣朋友二倫。却從義生。義則專論是非。是而義合。則爲君臣朋友。非而義離。則引退。義絕則可爲寇讐。故曰父子主恩。君臣主敬。明乎敬之義。則文王夷齊龍比皆敬也。武王亦敬也。天下無不是之父母。不可謂天下無不是之君上。但人臣一身生殺。惟君不可以私怨而生。懟叛之心。此昌黎二句之不朽於古今也。若其大義所在。則天降下民一節。此理巍然撫我。



則后虐我則仇亦天經地義如此非我一人得而狗  
心違天也如謂事君亦如事父連是非都抹殺則非  
止敬之  
道矣

君天也。魯論不仕無義。孔子於荷蓀丈人輩。尚以爲欲  
潔其身而亂大倫。留良乃謂合則爲君臣。離則義絕。其  
自絕於天。不待言矣。或疑留良之說。本之孟子。不知孟  
子君之視臣云云。對齊王言則然。觀其去齊三宿而後  
出。晝何惓惓不忘齊君也。先儒楊氏真氏論此甚詳。此  
一義也。抑又有說焉。孟子所言。乃戰國時之君臣耳。故  
曰有故而去。曰先之於所往。極之於所往。蓋不得於魯。



則去而之衛。不得於齊則去而之晉。所謂合則留。不合則去者此也。若一統至尊。則在國在野。莫非臣也。去將安往乎。古者五等諸侯。皆得臣其境內。而仕於大夫者。對諸侯則爲陪臣。於大夫則曰家臣。雖遞爲臣。而皆統於天子。坊記曰。天無二日。土無二王。家無二主。尊無二上。示民君臣之別也。又曰。君不稱天。大夫不稱君。恐民之惑也。蓋各君其君者。一家一國之私。而率土莫非王臣者。天下之公也。周天子在上。而戰國之諸侯。僭號稱王。兵爭不已。繩以春秋之法。乃不赦之罪。無怪乎其臣



之尤而效之也。又況當時游說之士。朝秦暮楚。去來無常。多非本國之人。而未有君臣之定分乎。然則善會孟子之言。正所以儆不臣之諸侯。而伸君臣之大義於天下也。豈亂賊所得而借口乎。孔子曰。善則稱君。過則稱已。則民作忠。善則稱親。過則稱已。則民作孝。蓋事君猶事父也。朱子曰。臣無說君父不是的。此便見君臣之義。程子曰。亂臣賊子。只因見有不是處。忠孝無二理。臣子無兩心。而留良乃欲區別於其間。至謂無不是一語。可言父母。不可言君上。是不獨立意與程子朱子之說相



背。且竟以孔子之言載於禮經者爲不足信也。是欲以其邪說蔽惑天下萬世。必不能泯之人心。以從於悖亂也。留良之罪。可勝誅乎。

呂留良云。恂慄威儀。註云。德容表裏之盛。則作求止苦功。固疎而做成效看者。亦隔也。用力只在學修。然必至表裏如此方是功夫足處。

註云。學。謂講習討論之事。自修者。省察克治之功。此求止之功也。又云。恂慄威儀。言其德容表裏之盛。此得止之驗也。一功一效。判然甚明。今留良謂恂慄威儀。不可以成效言。其惑人亦甚矣。且又云。用力只在學修。然必



至表裏如此。方是工夫足處。如留良之說。用力只在學修。則恂慄威儀。非用力處明矣。恂慄威儀。表裏如此。方是工夫足處。則恂慄威儀之爲成效。又明矣。前所云恂慄威儀。做成效。看亦隔者。獨何說耶。夫解經者。貴於釋人之疑。今一說而前後相左。摸稜兩端。誠不知其何意也。

子曰聽訟吾猶人也章

呂留良云此字指夫子之言本者大畏民志之所以然卽明明德也卽一聽訟而可悟必歸於明德此謂知本也大畏民志雖是本然只在聽訟上說此一事之本也到此謂知本句則已點明凡事總一本卽此



可見乃萬  
事之本也

註云。我之明德既明。自然有以畏服民之心志。畏服。猶孟子所謂心悅而誠服也。畏民志。卽是明德之明。民志畏。則民新矣。今云只在聽訟上說。此一事之本。謬也。

呂留良云。無情之不得盡其辭。非特震之於釣金束矢之際也。周禮之戶口版籍。咸隸於秋官。是爾室之中。皆閭黨已久納於大吏之庭矣。

稽民人之數。登其夫家之衆寡。職已具於司徒。鄉遂之官。登萬民之數。以詔司寇。而獻於王。又特屬之秋官司民者。蓋聖人刑期無刑之意。以爲民協於中。則麗於法。



者寡。意甚深遠。今反謂是法所以威震乎民。不惟非孔子推無訟由於大畏民志之旨。且與周公設官分職之義大相刺謬矣。其強不知以爲知。而敢於誣聖人之經如此。

### 所謂誠其意者章

呂留良云。意之善不善。是致知條下事。此但說實用其力耳。實便自慊。不實便自欺。欺慊之分。獨中自知。故功在慎獨。今人都將誠字作善字解。與中庸誠字義相似。因欲於獨中分別出善不善來。却誤入致知傳矣。且下節誠中誠字。又如何說得去。又因註有人所不知而已。獨知兩知字。遂亂拈致知不知。此兩知字。指其地言。卽中庸所謂人之所不見也。



致知誠意。雖爲兩事。而未始不相因也。若云誠意之事。與知無涉。則經文不當云欲誠其意。先致其知矣。且所謂格物致知者。於所未知之理。研窮體究。以求其知也。所謂謹獨者。雖已知其理。而臨事之時。恐爲私意所蔽。私欲所累。而不自覺。故省察提撕。以求無昧其所知也。知字徹首徹尾。如何離得。周子曰。幾善惡。朱子曰。審幾。分別善惡。正慎獨內事。何乃云誤入致知傳內。而與誠意無涉耶。誠意誠字。原與中庸誠字不同。程子所謂不欺其次也。然云誠字不可作善字解。則謬甚矣。誠便是



善。欺便是惡。如見孺子入井而惻隱。善也。少存一要譽之心。則自欺而惡矣。但作實其意。則字義親切而有力。作善其意。則字義寬緩而無力。故朱子於聖經章誠意註。初作一於善而無自欺。後改一於善三字爲必自慊。合之誠字本義。更著實耳。初非謂誠字不可作善字解也。留良錯會朱子之意。強分善與誠爲二。失之遠矣。

呂留良云。人每不能盡好惡之力者。緣其閒居不肯認真用力。自以爲人所不見處。可以放鬆。不知此處一鬆。無所不至。此放鬆處。必有其端倪。卽謂之幾。此是私欲插根處。又云。看註中下一地字。則獨字指人所不見之時境言。卽與下節閒居相照。非謂心有獨醒。知有獨覺。復說到致知甲裏去也。



此以慎獨獨字。卽當第二節閒居字看。大謬也。獨者。人所不知而已。獨知也。但發一念。則爲獨知矣。若所謂小人閒居云者。但未見君子之時耳。雖或與物接。不害其爲閒居也。所以謹獨之功。其幾甚細。朱子言無自欺。謂如意之所發。有九分九釐實了。只有一釐未盡處。便是自欺。此何等精細工夫。至於小人閒居爲不善。生於其心。見於動作。甚至與其徒黨共爲之。其狼藉亦甚矣。故朱子謂好善惡惡不誠。是自欺。小人爲不善。是自欺之極。以至於欺人。語類中言之甚明。蓋傳之引小人爲言。



者乃言其流弊之極。以警人一念初萌。不及覺察。潛滋暗長。莫知紀極。誠意之君子。當慎之於早耳。非謂誠意之功。只勝於無所不至之小人。而遂稱極則也。留良以閒居字卽當獨字註脚。淺深同倫。何其粗也。且其曰放鬆處。必有其端倪。卽謂之幾。亦非也。放鬆不放鬆。皆端倪以後事。蓋一念之動。便是端倪。便有善有惡。周子所謂幾善惡也。於此不放鬆。則能爲善去惡。於此放鬆。則流於惡而不自知矣。是端倪者。乃初動之幾。不能謹幾。乃謂之放鬆也。今云放鬆處必有其端倪。而謂之幾。豈



不倒置耶。

呂留良云好惡意也實其好惡誠意也好惡之實與不實只在初發念時省察令其好必如好色惡必如惡臭則閒居無不善之爲而誠中形外皆自慊矣故慎獨是誠意中細緊一步非誠意之外別有一條工夫亦非慎獨卽誠意也 又云好惡是意實用其力如好好色惡惡臭是誠稍有不實用力處卽爲自欺而不誠此五句是釋誠意正義但其用力之實與不實在閒居人不見處此是自欺之根須自己於此覺察而加謹焉此之爲慎獨此是誠意緊要關頭指示人下手不可以獨混意以慎混誠也看註中然其實與不實句用然字轉不一直說落細體會自明矣又云慎有嚴善惡意誠則實行其善而已兩義不同獨非意也慎非誠也

慎獨是誠意要緊工夫獨乃意之方萌時所謂動而未



形有無之間。卽通書所謂幾也。於此能慎。則後此之意皆誠。於此不慎。則後此之意皆僞。故註中特下然字一轉。以明實與不實關頭。正在獨知之地。語類所謂別舉起一句致戒者。言從意之全體中。特拈出意之方萌處說。未嘗謂獨非卽意也。或問講毋自欺句。卽云又欲其謹於幽獨隱微之奧。以禁止其苟且自欺之萌。正恐人誤認審幾一節工夫。在誠意之外。將誠意慎獨看成兩楨也。留良乃云慎獨非卽誠意。不可以獨混意。慎混誠如其言。則本文於此之謂自慊句之下。先當用一轉以



發其義不當直接云。故君子必慎其獨也。且誠意與慎獨兩言之者。惟大學此章耳。其他聖賢之經。與先儒之言。言誠意處。則不言慎獨。言慎獨處。則不言誠意。正以慎獨卽是誠意。原非兩件工夫也。若如留良說。則如中庸云。莫見乎隱。莫顯乎微。故君子必慎其獨也。及程明道云。有天德便可語王道。其要只在謹獨。此等言語。皆只說得一半。必須另補出誠意一段工夫。然後爲無滲漏也。可乎哉。且留良旣云。不可以獨混意。以慎混誠。而又云。非誠意之外。別有一條工夫。則已自知其有所不



通而流遁其詞亦矛盾甚矣。

呂留良云自欺乃不實用力之由自慊乃實用其力處似反正一例而實兩層也

朱子答孫敬甫書曰如兄所論則是不欺後方能自慊恐非文意蓋自欺自慊兩事相抵背按此則留良兩層之說非也蓋本文於毋自欺也如惡惡臭如好好色之下便直接云此之謂自慊明是一串事也若分作兩層則此之謂三字文義如何說得去耶。

呂留良云一念之實一事之成皆爲誠意至念念如是事事如是橫推開濶無窮日念念如是事事如是豎推久遠無間欲淨理純行道實有諸已乃所謂德也不是誠意外別有箇德亦不是纔誠意便是德



便能潤身。有一分德。自有一分潤。自下學立心至成德。有多少功候在。

既云不是纔誠意便是德。便能潤身。又云有一分德。自有一分潤。何自相矛盾也。德之潤身。如孟子所云仰不愧。俯不怍。蓋從戒欺求慊工夫。積累得來。若止一念一事之誠。安得有此效驗。至欲淨理純。乃聖人之盛德。而留良以誠意當之。稍通文義者。不爲此言。

呂留良云。有謂心廣體胖。卽心正身修。君子必正其心。必修其身。故不敢不誠。其意曰。心廣體胖。句非章意所重。不過反覆形容一箇意誠景象耳。若論誠意功效。則直至平天下絜矩之道也。只得箇誠意。豈止身心關係哉。况廣字與正字。胖字與修字。俱貼合。不上正爲廣。胖只是氣象上看。不是工夫效驗。極頭實



地故章句或問及先  
儒皆未嘗牽引也

心廣體胖。自戒欺求慊得來。註釋自慊曰快也。足也。事  
事快足於中。則內省無疚。泰然自得。而心廣矣。心廣則  
體胖矣。到此地位。雖非明明德之極功。然就誠意而論。  
已是十分功效。或云卽此是正心脩身。固非。留良謂非  
工夫效驗實地。亦非也。

所謂修身在正其心者章

呂留良云首節說不正之故。次節明身心之關。在字  
是正心工夫。是好字眼。與上有所不同。人要牽合有  
所謂有在故不在  
先說壞了在字



大學  
在字本是虛字。在於善則善。在於惡則惡矣。傳文在字固是好字眼。先儒所謂心在腔子裏是也。然舊解所謂有在者。乃指上文忿懣好樂等而言。欲動情勝。則在字又爲不好字眼矣。在此則好。在彼則不好。有何妨礙。留良又謂在字是正心工夫。此大誤也。在不在。乃指現成而言。有正心工夫。則在。無正心工夫。則不在矣。傳文此節言心不在之病。所以發明心之不可不正耳。非以在字爲工夫也。

呂留良云。大學誠意傳極著力。正心傳極不著力。蓋誠意在發動處。芟鋤用力。不可不猛。到正心時。已大



段是好只在打磨本體涵養此心使無偏倚固執之病而已故傳中只論不正之害不會實講正心工夫以既知其爲不正之害只消畧畧提撕本不甚著力故也

留良謂正心只是打磨本體大段不用力此大謬也註云必察乎此而敬以直之本兼動靜而言蒙引亦云視聽時也要心在豈可謂正心專是靜存工夫卽如留良言知其爲不正之害只消畧一提撕提撕非卽省察耶朱子釋定性書云忘怒則公觀理則順二者所以自反而去蔽之方也偏倚固執之病又豈畧一提撕所能廓清耶



大學  
三  
所謂齊其家在修其身者章

呂留良云但看諺下一莫字可知溺愛不明不獨指庸愚也頗有道義自命而營逐以濟不肖之惡或詞章名世而標榜以譽不學之文反躬試問真不可解及其論刺他人又未始不了了也此在賢者不免况流俗乎吾輩有子待教者不可不一深省

朱子曰正心修身兩段差錯處皆非在人欲上又云人有正心而身未修者故於好惡間不可不隨人節制按此則此節莫知子之惡只是愛之過而不知其惡非明知而故護之也如留良所言既道義自命矣而又營逐以濟不肖子之行惡此正小人閒居爲不善無所不至



也。若夫實行不修。徒以詞章剽竊聲譽。又爲不文之子。標榜寡廉鮮恥。莫此爲甚。而呂留良乃謂之賢者。謂之非庸愚。不咎其立身之不正。而惟歎其教子之不善。卽此一段言語。其底裏畢露。肺肝如見矣。

所謂治國必先齊其家者章

呂留良云。時解誤看註中君子修身句。遂將孝弟慈屬君子下三句。屬國人說來。竟犯第三節效驗矣。於是又有謂上下句俱就君子身上說者。亦非也。直當撇開君子國人。竟講家之有孝弟慈。卽國之所以事君事長使衆之道。所以不出家而成教於國何等明白直捷。

陸龍其松陽講義云。此條孝弟慈事君事長使衆皆在



君子一人身上說。大全吳氏及蒙引存疑皆然。蓋事君  
事長使衆是君子處國之事。不是國人從教之事。事君  
事長使衆。一件不妥當。便不能成教於國。自萬曆以前。  
從無異說。至顧麟士說約。始將孝弟慈屬君子。事君事  
長使衆屬國人。近又有謂上下截不著國人。亦不著君  
子。止空說理者。學者淆惑不定。惟仇兆鰲力闢時解。而  
從蒙存舊說。此三句始明。所云時解者。謂麟士與留良  
也。然則留良之曲說。龍其久病之矣。且留良釋下節亦  
云。此言孝弟慈之推行本於自然。是君子之事君事長



使衆由家之孝弟慈推而行之。留良亦似窺見其義矣。何以釋孝者三段。乃云只虛言其理。不貼君子身上說。耶。旣不貼君子說。所謂推行者。果孰推之而執行之耶。至此章釋治國之義。諸侯卿大夫士。皆有事君治民之責者也。留良乃謂事君如何貼得君子邊去。此尤謬誤之甚者矣。

呂留良云上言家國之理。本通此下方言推行事效。此節乃上下交接處。言孝弟慈之推行。本乎自然。只要誠心求取。而三者之中。惟慈心最真。而易曉。故特引以証三者之同。然非謂治國推行盡於慈。亦非謂推行便有政法作爲也。又云次節只說端倪。自然不說推行。又云第二節說道理已在推行處說推



行却只說端倪自然仍在道理  
上看到下兩節纔正講推行事

按朱子語類。劉潛夫問家齊章並言孝弟慈三者。而下  
引康誥以釋使衆一句。不及孝弟。何也。曰孝弟二者。雖  
人所固有。然守而不失者亦鮮。惟有保赤子一事。罕有  
失之者。故聖賢於此。特發明夫人之所易曉者。以示訓。  
正與孟子言赤子入井之意同。此留良立說之本也。然  
其曰慈心最真而易曉。則又與朱子之意相左矣。夫朱  
子何嘗曰孝弟之心俱屬矯強。惟慈心爲最真哉。亦曰  
孝弟之心。愚者或失之。惟保赤之慈。則賢愚所同耳。一



經留良引據。便以慈心最真爲言。其悖於理也甚矣。且留良旣云推行不盡於慈。又云推行非有政法作爲。此何說耶。夫曰推行。則便有政法作爲矣。無政法作爲。則亦無推行之事矣。或問云。傳之言此。蓋以明使衆之道。不過自其慈幼者而推之。而慈幼之心。又非外鑠而待於強爲。事君之孝。事長之弟。亦何以異於此。觀此。可知孝者三段。與此節引康誥言如保赤子。正說推行之事。若下兩節言化成之效。歸本於藏身之恕。却無推行之義。留良乃謂到下節纔正講推行。此於書旨全然不懂。



且與前推行不盡於慈之說自相矛盾矣。尤可怪者。纔說此節言孝弟慈之推行本於自然。又云次節只說端倪。不說推行。旣云不說推行。又云道理已在推行處。讖言讖語。教人如何理會。

呂留良云。玉樹堂諸子拈有諸已而後求諸人。題有謂宜重上半截。不則似爲求人而有諸已。非藏身之恕矣。予謂言各有當。此章恕字原在齊治上說。與他處恕字不同。故朱子謂尋常人有諸已。又何必求諸人。無諸已。又何必非諸人。如論語躬自厚而薄責於人。攻其惡。無攻人之惡。是也。大學之說是有天下國家者。勢不可以不責他。蓋治國者勸人善。禁人惡。便是求諸人。非諸人。以此條觀之。可知此兩句却重下半截。蓋有諸已。無諸已。皆指所求諸人。非諸人之事。理言也。求與非。卽上文所令有與無。卽上文所好因。



所令轉出所好則此兩句自從求非轉出有無乃合語意若云凡治國之求人非人必有諸已無諸已而後可耳

按留良所引朱子此條特以明求人非人之不可無非以此爲重而上半截反輕也論通章之義趣尋上下文之語脉重在有諸已無諸已明矣蓋求諸人非諸人者如條教禁令之施乃有國者之所同所爭者在有諸已與否無諸已與否耳不重根本而重枝葉有此理乎卽如留良所云求與非卽上文所令有與無卽上文所好固也試問上文此句以所好爲重乎以所令爲重乎何



留良之不反而思之也。且凡言而後字者。未有不重上半截者也。如此書知止而后有定一段。物格而后知至一段。及此章下文宜其家人而后可以教國人。三而后字。皆重上半截耶。重下半截耶。此理至明。人所易曉。而留良故爲改換面目。朝三暮四。以顛倒學者。謂非狙詐之術。其誰信之。

呂留良云。家國相通。教成功效。至三節已說盡。第四節復承一人定國。說到藏身須恕。正補出修身爲齊治之本。恕字乃成教之要領。卽下章絜矩相連血脉也。此三節咏歎。正鞭辟向藏身之恕。爲下章絜矩之原。不是重衍家國相關疣贅閒文也。



故治國在齊其家節已通結上文。此三引詩乃反覆咏歎治國必先齊家之意。朱子註甚明白。非於上文之外別添意義也。留良乃謂此三節正鞭辟向藏身之恕。失其旨矣。且此處旣云鞭辟向藏身之恕。不是重衍家國相關閒文。後段又云此三節見家國相連處。非復上節專說一人修身之義。豈不自相刺謬乎。

呂留良云合齊與治而總命曰教言在家則欲人人如此在國則欲家家如此也。然必一家之人人如此而後可求一國之家家如此。此欲治先齊之正面也。自藏恕喻人以上都責重一人身上。此是說所以齊之本未盡得一家人人如此意。故又引三詩咏歎指示箇景象。所謂宜家人宜兄宜弟其爲父子兄弟足



法皆指一家人人能如此意見家與國成教  
相連處非復上文專說一人身修之義矣

留良分藏恕喻人以上。只責重一人之身。至三引詩。方  
說一家人俱能如此。以成教於國。非也。如上文云一家  
仁。一家讓。皆通指一家言。未嘗專指一人之身也。如下  
文云宜其家人。宜兄宜弟。其爲父子兄弟足法。皆歸重  
於一人之盡倫。非泛指他人也。留良強分二解。豈不大  
謬乎。然留良所以爲此說者。其蔽有二。此三引詩。只以  
咏歎上文。無別添意義。而留良不知。必欲強進一解。其  
蔽一也。此章言治國在齊其家。只以家與國對。不以身



與家對以齊家在修其身之義。已於上章說明故也。是以此章或言一身。或言一家。皆與治國爲對。不必更分身家。而留良不知。必欲強作三層分疏。其蔽二也。

呂留良云。欲一家中人人如此。又有箇次第。教成必始於夫婦。而後及兄弟。而後及父母。看中庸妻子好合二節。及孟子老吾老一節。皆從夫婦兄弟說起。蓋家之難齊。最是此二項。而二項中。又重在夫婦兄弟之尤。未有不起於閨房妯娌之際者。故此二項人教成。以教家無難。卽以教國無難矣。緣家人國人。人人各有箇夫婦兄弟父子。故教一家。卽教一國之家。家無二理也。

中庸妻子好合二節。先言妻子兄弟。而後及於父母。特以明卑邇高遠之意。非劃定一家之中。必先妻子而次



兄弟而後父母也。人惟以父母之心爲心。則處一家之  
妻子兄弟。各得其所。亦猶以天地之心爲心。則處天下  
之民物。各得其所。此西銘之大旨也。烏有孝於父母。必  
以夫婦爲先之理。況此章引詩咏歎。原無此意。其曰宜  
其家人。乃引詩斷章。就君子之身而言。第三節云其爲  
父子兄弟足法。乃總一家之詞。亦非至此而始及父母  
也。留良之說。由於錯看朱子或問。或問云。旣結上文而  
復引詩者三。何也。曰。古人言必引詩。蓋取其嗟歎咏歌。  
優游厭飫。有以感發人之善心。非徒取彼之文。證此之



義而已。夫以此章所論齊家治國之事。文具而意足矣。復三引詩。非能於其所論之外。別有所發明也。然嘗試讀之。則反復吟咏之間。意味深長。義理通暢。使人心融神會。有不知手舞而足蹈者。是則引詩之助爲多焉。曰。三詩亦有序乎。曰。首言家人。次言兄弟。終言四國。亦刑于寡妻。至于兄弟。以御于家邦之意也。按此。則朱子釋三引詩。只是咏歎上文之意。末引思齊之詩。乃因釋傳而及之。以示人下手工夫。初非釋傳正解也。若謂重在分別次序上。則所謂復引三詩。非別有發明者。何以云。



耶。况末段亦只云。首言家人。次言兄弟。終言四國。未嘗謂由妻子及兄弟而後至於父母也。留良動稱遵朱。其實全無體會。往往如此。

所謂平天下在治其國者章

呂留良云語句是從矩出道語意却是爲道指矩謂平天下之道雖與國有不同然卽在家國之矩絜之而得故曰平天下在治其國 又云絜矩人皆以心字混過縱好只做得矩字不曾做絜字不知矩是家國天下之所同治與平不同處正在絜字中見此道之所由出也故朱子謂到此節次成了方用得蓋家國相關只在此心感應而國與天下相關又有政事之不同絜家國之矩於天下而道生焉故此節眼目在道字而因矩爲道重却在絜字也



絜矩二字。乃平天下之要領。道字只是虛字。所謂道者。卽絜矩是也。絜矩之道。猶云孝弟之道。仁義之道。修己治人之道之類云耳。今留良云。從矩出道。爲道指矩。則似以矩與道爲兩物而相對。又云絜家國之矩於天下。而道生焉。則又似以道與絜矩爲兩事而相因。其不通文理甚矣。此等言語。徒足以滋人疑惑。其於經義。非徒無益。而又害之也。

呂留良云。家國相通。以理。以意。國與天下相通。便有政事制度。理意只以應感相示。到政事制度。便有宜此不宜。彼性情風氣之異。矩只此矩。絜處却不同。又云有云。絜矩是家國已行。不是到平天下。方絜矩。



不知正爲平天下道有不同故須絜耳如國之政事與天下之政事其間許多條目參差不齊聖人正恐於此處稍有未盡則不能均平矣於家國間得此矩而絜之天下爲道務必求盡此參差不齊者耳故謂矩爲家國所同則可若絜矩之道則畢竟朱子謂到此節次成了方用得也蓋矩是理一絜是分殊重矩字看則每縮到家國一源而此處却重絜字註中推以度物正爲是也

家國天下莫非此心之所推均此矩也然天下大矣天下之事多矣苟絜之道有不盡則矩之用有未周故前數章不言絜矩而此章言之或問詳矣留良乃云家國相通以理以意國與天下相通便有政事制度夫齊治平各有當盡之道若但以理以意別無措置之法無論



國不可治。家亦安可得而齊乎。留良又謂矩是理一。絜是分殊。亦非也。絜矩云者。推其同以合其異。使不一者歸於一也。若以絜字爲分殊之義。則經文於釋絜矩處。應別標親疎厚薄之義。不應直云所惡於上。毋以使下。以及前後左右。皆以情同理一者言之也。且所謂理一分殊者。如孟子所言親親而仁民。仁民而愛物。同一仁之理。而所施於親與民物者。有差等是也。卽如所惡於上。毋以使下。所惡於左。毋以交於右。上下左右間。各有當盡之道。終不成卽以事上者使下。待左者待右乎。但



九學  
三十一  
絜矩之義。只就理一而言。而分願之各得。卽在其中。因其分之殊。絜以理之一。而後上下四旁。均齊方正。不一者。歸於一。而絜矩之道得矣。留良於理一分殊之義。茫然莫辨。不但不明於絜矩之道已也。

呂留良云。人心所同。有人欲有天理。如好貨好色。人所同也。然須是應好之色貨。乃得。若但說好色好貨。人所同。却是人欲也。遂人心之人欲。則大亂之道矣。故孟子曰。心之所同然者。謂理也。義也。孝弟慈。理義之同然。故曰。矩。禮樂刑政制度。亦理義同然之用。故曰。絜矩之道。從此矩推行爲道。卽理義同然之用。故曰。絜矩之道。蓋謂絜人心同然之理。而爲平天下之政事也。但從血氣嗜欲。求各遂其願。此是黃老之自然。無爲釋氏之方便。普度非聖人絜矩之道矣。



人心所發。有天理有人欲。愛親敬長慈幼。道心也。饑食渴飲。人心也。自其人之身言之。則有理欲之殊。自在上者。經畫區處。使各得其分願。則無非天理矣。朱子荅黃商伯書云。須理明心正。則吾之所欲所不欲。皆得其正。然後推以及物。如其不然。而以私意自便之心爲主。又欲以是而及人。則人道不立。而驅一世以爲姑息苟且之場矣。留良謂必應好之貨色。始得等語。卽剽此說。然謂血氣嗜慾之遂其願。非絜矩之道。則謬矣。夫所謂血氣嗜慾者。如飲食男女之欲之類。此而不得遂其願。尚



得謂治平乎。孟子言好貨好色與民同之。雖公劉太王之行王道。不過如此。若如留良言。將謂居有積倉。行有裹糧。內無怨。外無曠。皆姑息苟且之爲乎。

呂留良云。有云德爲治天下之根本。非德爲財本也。財爲治平之末務。非財爲德末也。余以爲不然。平天下章論財用。自此始。直至傳末。皆言此事故。先慎乎德一句。德字便專就財用而言。看此節註云。本上文而言。則德之本。正對財。財之末。正對德。故下節緊接外本內末。非可以泛論治平也。從通章泛論。不說道理。不是實非本節之旨矣。又云。本則理一。末乃萬殊。只是一箇明德對新民言。則民爲末。在聽訟言。則訟爲末。就財用言。則財爲末。須粘末看。又須離末看。如此。本字須緊從財上較出。方見親切。然不得離看。意則似專爲財而慎德。語病不小矣。



德爲治天下之本。則是爲財用之本矣。財爲治天下之末。則是爲德之末矣。此等分析。無益於理。原可以不置辨也。若論此段文義。則朱子註云。本上文而言。上文從先慎乎德。說到有人有土。方說到財用。然則德者。人與土之本。不獨財用之本也。財者。不獨爲德之末。較之人土。尙爲末也。就二者比之。彼謂德總爲治天下之本。財總爲治天下之末者。不優於留良之說乎。且留良旣云本須粘末看。又云又須離末看。前旣云先慎乎德一句德字。便專就財用而言。後又云恐似專爲財用而慎德。



語病不小矣。夫一言之間。而游移矛盾。至於如此。所謂中心疑者。其詞枝遁。詞知其所窮也。

呂留良云。自誠意章至此章。皆以好惡爲用力處。然聖人論用力。都重惡一邊。看釋絜矩節。便見論語講恕字。道不遠人。章講忠恕。皆以不欲勿施。故朱子謂絜矩。正是恕者之事。此節又是絜矩中一事。其義本一。恕以求仁。故惟仁人能惡。能愛。此謂二字緊承上文。側重惡人。又云。釋絜矩之道。節只言所惡道理。原重惡邊。說絜矩從恕字來。不欲勿施。強恕之道。本如是。

仁人放流一段。承上文媚嫉之小人而言。惡小人則愛善人可知矣。故曰能愛能惡。非有輕重於其間也。且仁人之惡媚嫉之人。正以其妨賢害能。使善者不得進。故



非放流之不可。是則仁者之惡。正根於所愛而發。何反云惡爲重而愛爲輕耶。况聖賢之言理。有舉其全而言者。有言其一邊而意已明者。非以此爲輕重也。如此段言仁人惡媚嫉之人。則其愛休休有容之人。卽在言表矣。又留良引論語中庸不欲勿施。以爲重惡之證。則如論語云已欲立而立人。已欲達而達人。中庸云所求乎子以事父。所求乎臣以事君。又將何說以處之耶。

呂留良云。大道鑒定。用人理財。固非。又有直指卽絜矩之道。其謬同也。絜矩之道。亦所以行此大道者。與忠信二字對。非卽大道也。絜矩之道。從仁恕生來。忠信從誠生來。皆所以行此大道者。猶之中庸行達道。



大學  
歸於達德道德一本於誠相似 又云註中明訓居  
其位而修己治人之術蓋卽指禮樂刑政動止云爲  
總包貨財舉錯之類而言非  
絜矩之道也玩章句自見

大道卽絜矩之道也。傳者何以不言絜矩之道。而註又  
何以云修己治人之術耶。聖經首言綱領。以明德爲本。  
新民爲末。次言條目。以修身爲本。家國天下爲末。傳者  
逐條分釋。至平天下章。爲新民之極。乃推原得失之故。  
而歸本於君心之敬肆。以明經文本末之義。蓋此絜矩  
之道。乃治人之事。而本於忠信。則治人之事。卽修己之  
事。此絜矩所以爲大道。大道卽大學之道也。留良乃云



絜矩所以行此大道。與忠信對。猶中庸達德行達道。而德又本於誠。是以絜矩與忠信爲兩物而相對。又以大道與絜矩忠信爲三事而相因也。夫果絜矩忠信相對。而爲行大道之兩物。則傳文推原得失。何不並舉絜矩忠信二者乎。若以三者爲遞相因。比之中庸達道達德之本於誠。不惟不明此章之義。先懵於達道達德所以行之義矣。中庸所以行之者一。一字。卽在達德之內。非德之外。別有一誠。而以之行德以行道也。況忠信爲體。絜矩爲用。全體大用備矣。此外又有所謂大道。不知果



何所指也。或問云：盡已之心而不違於物，絜矩之本也。驕泰則恣已徇私，以人從欲，不得與人同好惡矣。按此則大道仍當承上文好惡之公言。忠信驕泰則仁不仁之分也。無私而當於理者，仁也。未能仁而本忠以行恕者，忠信也。留良既知絜矩從仁恕生，忠信從誠生，是絜矩卽恕也。忠信卽忠也。以忠信行絜矩，所謂無忠做恕不出。留良何未之思耶。

呂留良云：以上只是說絜矩，故於上節特註云：自秦誓至此，又皆以申言好惡公私之極，以明上文所引南山有臺節。南山之意，正結清上文見此節之不粘連楚書數節也。又於此節註云：因上文所引文王康



誥之意而言則此節當直承文王康誥兩言得失而不當承上數節又明矣或云此節是上承用人下接理財過脈不宜斷絕此正是謬論如其說理財上已說過下文不過因上有財意而申言之耳原非特起何用過脈哉總之眼光拘小只在貼身上下尋來路去路而不知古人文章端緒接續脈絡貫通間見層出有別見於言外者其來路去路本自了然但粗心者自不辨耳

此章自第三節至此節分爲三段俱言好惡之公私而推原得失之故以結之三段意實相承故上節註曰自秦誓至此又皆以申言好惡之極云云曰又皆以可見第二段言理財亦是申明上文引南山有臺節南山之意也又康誥節註云因上文引文王詩之意而申言之



此節註云。因上引文王康誥之意而言。蓋得衆失衆之得失。以人言。善不善之得失。以身言。忠信驕泰之得失。以心言。一節密一節。故曰至此而天理存亡之幾決矣。傳文及註。段落界限。何等分明。留良乃謂絜矩意。上節已說完。此節又另起總結。直承文王康誥兩言得失。不當承上數節。然則康誥節。亦當舍上數節而承殷之未喪師節。殷之未喪師節。又將何所承耶。留良全不細心體會。反謂人皆眼光拘小。不解古人文章脈絡。何其妄也。



呂留良云舒字有二義舒徐固是舒舒暢亦是舒也  
南北轉漕費以鉅萬固是不舒太倉之粟陳陳相因  
亦是  
不舒

漕運多少。古今異宜。然其立法之善否。亦存乎其人耳。  
如漢都長安。轉漕稍難。而鄭當時引渭水穿渠。省漕運  
卒。而關中多得穀。唐都長安。運道艱難。粟不時至。高宗  
中宗之世。常間歲卽車駕幸東都。以寬民力。及開元時。  
裴耀卿請沿水爲倉。轉相運置。省費不可勝數。而關內  
以饒。此等規畫。豈可少也。漢文帝太倉之粟。陳陳相因。  
實由重農節儉所致。與此書所謂爲之者疾。用之者舒。



大學  
四  
云者差不遠矣。而留良乃輕訾之何耶。

呂留良云君民上下相接純是義而其所以相接處原是仁不容分屬也。然上但知有義則驕恣貪虐之患生下。但知有仁則觖望僭亂之禍作。故上專責仁則下自安於義。

上好仁。下好義。雖分屬。然仁與義無往而不在也。不忍於民。仁也。禮下取於民。有制。獨非義耶。敬其君。義也。急公親上。獨非仁耶。仁義惟患不知耳。既知有仁有義。而反爲貪虐僭亂之萌。有此理乎。卽如此節以仁屬上。以義屬下。而下節以義爲利。又以義屬上矣。語固各有當也。留良不知此理。其言乃似仁義所以階亂者。豈不怪



且謬歟。

呂留良云問大夫之富數馬以對正謂他物稱是耳若止煞點馬字講則誤矣

古者卿大夫之祿皆以田賦爲等。車乘出於田賦者也。故數馬便知其車乘幾何。田祿幾何。留良乃謂止煞點馬字講則誤。豈甸邱出車之法亦未之攷耶。











